

Nerisassanik isumassarsiorfiup ammarneqarnerani oqalugiaat

Nuannaarutigeqaara Kommune Kujallermi borgmesteritut maanga Kujataanut tikilluaqqussallusi. Tikilluaritsi nuna tamakkerlugu maani INUILI-mi nerisassanik isumassarsiorfimmum, tamatumani neriuutigaara kikkulluunniit tamarmik pissanganartumik isumassarsiorfiulluurtumillu ullut atorumaaraat kalaallit nerisassiassaatsialatsinnik sukumiisumik oqaluuserinninnissamut. Aallarniutigalugu aamma INUILI suliniuteqartuusoq aamma Naalakkersuisoqarfik, nunatsinni kommunit kiisalu allat aningaasatigut ikiuusimasut inuussutissanik isumassarsiorfiup ingerlanneqarnissaanut periarfissiisimasut qutsavigerusuppakka.

Soorunami kommunitut nuannaarutigisorujussuarput isumassarsiorfiup maani Kujataani ingerlanneqarnissaa, oqaatigerusuppapullu nunap immikkoortuini allani nerisassaiassalerinerat ataqquisorujussuugatsigu – taava uatsinnut tupinnassaaq inuussutissanut tunngasunik aaqqissuussineq manna maani kommunitisiniisimassanngippat maanilu Narsami INUILI-mi.

Kujataani immikkoortut pingasut ineriartorfissatut toqqarsimavagut, tassaasut aatsitassat, takornariartitsineq nerisassiassallu.

Nerisassiassanut tamanut tunngatillugu Kujataa sassaalliutissarpassuaqarpoq. Maani Kujataani silaannaq oqortoq naasorissaanermut naatitsinermullu periarfissiilluarpoq. Tassalu maani savaateqarnermik ileqqutoqqat takusinnaavasi, ukiumut savaaqqat 25.000-tit missingi tunisassiarineqartarput maani nunatsinni tuniniagassat.

Narsami Sofus Frederiksen nunatsinni kisiartaalluni nersussuaateqartuuvoq piffissamilu kingullermi nersussuaatai amerlineqarsimapput, aammalu savaatillit allat nersussuaateqarnermik aallartinissaapput.

Maani katoffilunik naatitanillu allanik soorlu icebergsalaatinik, tomatinik, ruuanik il.il. naatitsisoqartarpoq. Tuttuuteqarfeqarpugut neqissatsinnik pilersuisinnaasunik, aamma imarput eqqatsinniittoq pitsassuarnik aalisagaqarpoq, assagiarsuqarpoq angisoorsuarnik qangaaniilli piniagassarparsuaqarlunittaaq.

Pikkorissorsuarnik nukittuunillu nerisassiortunik suliffeqarfeqarpugut, Nunatsinni kisiartaasumik inuussutissalerinermik ilinniarfeqarpoq Upernaviarsummilu nunalerinermik misileraavik aamma maani Kujataaniippoq.

Taakku saniatigut saniatigooralugu tunisassiortoqarpoq soorlu igutsaap tungusunnitsuutaanik, nerisassanut akoorutissanik allarpassuarnillu.

Taamaattumik pissusissamissoorluinnarpoq suliffeqarfittagut inuussutissalerinermillu ilinniarfik INUILI suleqatigalugit pimoorussamik nerisassalerinermik suliniuteqarnerput ingerlaavartumik piginnaasanik ineriartortitsiuarnekkut nutaanillu tunisassiornikkut.

2009-mi augustusimi kommuni inuussutissalerinermik isumasiortitsivoq aamma maani INUILI-mi.

Isumasiortitsinermi tassani Inuussutissarsiornermut Suliffeqarnermullu ataatsimiititaliap siulittaasu Kalistat Lund suaaruteqarpoq ”Kujataa nunatta tamarmi nerisassaasivigissagaa”-nik takorluukkamik.

Taamanimiilli nukippassuit nunatta immikkoortuani nerisassalerinermik aallutaqalerput suliniutillu arlallit aallartinneqarsimallutik.

Isumassarsiat ilaat isumasioqatigiinnermi saqqummiunneqartoq tassaavoq neqilerinermik ilinniartitsilernissaq, ullumikkullu inersimasut 12-t neqilerinermik Neqimi ilinniartuupput. Tassalu nunatsinni inersimasunik ilinniartitsinermik suliniut kisiartaasoq annerpaaq.

Neqilerinermik ilinniartut aappaagu ilinniarnertik naammassissavaat – aamma naatsorsuutigaarput piffissami tassanerpiaq nutaamik toqoraavittaassatta naammassineqarsimanissaa.

Sivisuallaassaqaq suliniuterpassuit 2009-mi isumasioqatigeereernermi aallartinneqarsimasut tamaasa taagussallugit, taamaammat ataasiakkaat tulleriaarlugit naatsumik taagupallalaassavakka:

Tunisassiorlut amerlasuut takkussimapput soorlu nunatsinni tuniniagassanik aalisakkanik panertitsisartut, panersiivinnik illuaraliortitertoqarsimavoq, tunitsiviit nunaqarfinniittut suleqatigiiffingortinneqarsimapput, katoffiliniq naatitsisartut amerliartuinnarput, akunnittarfiutilittagut takornariartitsivigullu kalaallit nerisassiassaataannik ukkassinerulersimapput, nittartagalliorsimavugut mamartut.gl taaguutilimmik, taanna aqutigalugu tunisassiorlut tunisassiaminnik nittarsaasinnaapput, aamma tanngassimaarutigeqaarput filmi A taste of Greenland, tassuunakkut Nunarput nittarsaaneqarpoq kisiartaasunik nerisassiassaateqarnitsinnik.

Kiisalu pilersaarutit sallerisaattut pimoorutilersimavarput pisortat suliffeqarfiini kalaallit nerisassiassaataannik atuinerulernissaq. Upernaap ingerlanerani igasut pikkorissartinneqarsimapput, nuannaartigeqalugulu nalunaaruteqartarput atuisut akornanni suliniut pillugu angisuumik naammagisimaarinnittoqarnera.

Tassalumi isumatoorujussuuvoq pisortat suliffeqarfiutaanni kalaallit nerisassiassaataannik atuisoqarnera.

Siullermik maanni Nunatsinni kisiartaasunik peqqinnartunillu nerisassiassaateqarpugut, aappasaanik nerisassiassaatigut kulturitta kinaassutsittalu ilagaat pingajussaanillu kalaallit nerisassiassaataannik atuinerulerneq najugaqarfinni suliffissaqartitsivoq.

Kommune Kujallermi aammattaaq naammagisimaartorujussuuarput politikikkut nerisassat tungaanut sammininneruleriartuinnarneq, tassalu imminut pilersornerulernissaq kalaallillu nerisassiassaataannik atuinerulernissaq, tamanna Nunap Immikkoortuisa Ineriartortinnissaannut periusissamut maanna ilanngunneqarsimavoq.

Maani Kujataani soorunami nerisassiassaatitsialagut nerisassaategullu nunatsinni najugalinnut, tikeraanut allanullu agguaakkusoqaagut.

Aamma nunap immikkoortuini tamatta ataasiakkaarluta immikkut ittunik nerisassanik tunniussasaqarpugut nerisassiornerup iluani.

Nunatta aallartippaa nuna tamakkerlugu suliniut filmi taaguutilik A taste of Greenland, atagu ataatsimoorluta aappaagu nuna tamakkerlugu nerisassanut tunngasunik festivalilioriarta, tassani

ilisaritissinnaassavagut Nunatsinni illoqarfippassuarniit nunaqarfippassuarniillu nerisassaatigut pitsaanerpaat.

Sunami pitsaanerpaava illinnarnerpaamik nerisassanik sassaallerfigitineq, nerisassiassat pitsaanerpaat misigiasaqarfigissallugit aamma ”**Kalaallit mamartuutai**” tamulussallugit!

Sulilluarisi aammaarlunga Kommune Kujallermut tikilluaquassi.